




春秋非左

坤

□ 12
2925
2



12
2925
卷 2



春秋非左卷下

京山郝敬學

輯

成公 凡二十八條

元年三月作丘甲傳不詳其法若使丘明作傳

此類自當了然

二年四月丙戌衛孫良夫帥師及齊師戰于新
築衛師敗績傳謂衛伐齊非也新築衛地也
衛師未出境與齊戰何為伐齊蓋齊侵魯乘

春秋非左

卷下

成公

一



去五味均平葺



勝伐衛戰于衛地也。不書齊伐者，蒙上伐我之文，戰于新築，則齊師過魯人衛境矣。

十一月丙申，公及楚人、秦人、宋人、陳人、衛人、鄭人、齊人、曹人、邾人、郕人盟于蜀。傳曰：不名，匱盟也。于是乎畏晉而竊與楚盟，故曰匱盟，非也。十國大夫而皆名，則瑣矣。他會皆然，何獨此為畏晉畏，非春秋所譏也。是會也。楚共王幼，不行。陳蔡二君亦幼，乘楚子戎車，不書。陳蔡未與盟也。傳謂乘楚車為失位，故不

列于諸侯，皆鑿說也。

晉敗齊師于鞏，齊使賓媚人賂晉曰：五霸之霸也，勤而撫之，按成公時，公桓文未遠也。五霸尚未終不應，豫稱五霸，此為後世語，甚明。杜元凱遠引夏商豕韋昆吾等，解終不悟，傳之為後人作也。齊師敗績，公孫之來，齊師敗績，公孫之來，齊師敗績，公孫之來。晉侯使鞏朝，獻齊捷于周定王，與之宴，而私賄之。且告之曰：非禮也。勿籍夫，周自平王東遷，其威令不及魯衛之君，以禮假人，不知其幾。

獨為此兢兢無是也。

三年楚歸晉智瑩楚共王問瑩何以報我瑩對與重耳對楚成王語雷同脩辭熟套也。

冬十有一月晉侯使荀庚來聘衛侯使孫良夫來聘傳曰公問諸臧宣叔曰中行伯之于晉也位居三孫子于衛為上卿誰先對曰次國上卿當大國之中中當其下下當其上大夫小國上卿當大國下卿中當其上大夫下當其下大夫古之制也晉為盟主宜先丙午盟

晉丁未盟衛傳以為禮非也禮序昭穆衛文之昭而晉武之穆也序爵良夫上卿而荀庚下卿也宜先衛今舍周班而較叔季之強弱豈禮歟孟子敘周爵公侯伯子男凡五等卿大夫上中下士亦五等故書言列爵惟五五禮五玉五器唐虞時已然矣爵未有過五等者漢博士作王制因襲傳語則是五等之中又有中卿下卿上大夫共八等豈古之制歟晉作六軍不書傳不言其故唯天子六軍晉作

僭也。凡諸侯僭亂之事，經不毛舉，言不順也。惡極于弑君亡國，包舉矣。傳不達。四年，公如晉，傳稱晉侯見公，不敬。季文子知晉侯，必不免為後十年。晉景公死，附會之。五年，晉放趙嬰于齊，嬰夢天神索祭，祭之明日見放，故免于死。此沙門誑愚俗語也。六年，鄭伯如晉，拜成，授玉，過于楹，東晉士負伯曰：鄭伯其死乎？視流而行，速為是年六月，鄭悼公卒，附會之。

取鄭傳曰：言易非也。經書取多矣。其皆易邪。九年秋，晉人執鄭伯，欒書帥師伐鄭，傳稱鄭使伯蠲行，成晉人殺之。書執鄭伯而不書殺伯，蠲豈亦以不告歟？傳不言其故。十年五月，公會晉侯、齊侯、宋公、衛侯、曹伯，伐鄭。按傳，鄭伯之見執也，鄭公孫申謀曰：我別立君，以示不急，晉必歸君，遂立太子髡頑。晉人果伐鄭而歸，鄭伯、鄭伯歸討立君者，殺叔申與弟叔禽，皆不書。夫急君難而故棄之，是以

君微倖也。因夫人謀得歸，而又殺之，是誅有功也。鄭既有君而後歸，君是歸，不為德也。事皆反覆傾險，不可以為訓。後世有用此立功，其得禍亦相似。始知春秋慮遠識深，非聖人不能作。故曰言之必可行，傳不及。

丙午，晉侯孺卒。傳稱晉景公疾，趙同、趙括、之祖為厲也。公夢疾化為二豎，伏膏肓之間。小臣夢負公升天，而以為殉，皆附會不經之譚。凡春秋書事，據實而已，未嘗為隱語也。是年五

月，晉景公將伐鄭而病，立太子州蒲為君。以會諸侯，伐鄭。父在子立，父將死而子預外事，皆非禮也。然亦書晉侯，此類皆不待貶，自見也。何事于隱語乎。

十二年春，周公出奔晉。傳曰：凡自周無出，非也。夫經既書出奔矣，又云無出，變幻譎張。啓後儒穿鑿之例，皆此類也。

十三年春，晉侯使卻錡、己來乞師。傳稱將事不敬，孟獻子知卻氏亡，以一人容，止決一族之

禍雖聖知不及此因晉將誅三卻附會之獻
 子如周周劉康公以成肅公受服于社不敬
 亦料其將死果死習誕成套甚可厭也
 十四年秋叔孫僑如如齊逆女傳曰稱族尊君
 命非也九月僑如以夫人婦姜氏至自齊傳
 曰舍族尊夫人亦非也前書叔孫後蒙前文
 耳尊君則書族尊夫人則不書於義何居
 十五年晉三卻譖伯宗及欒弗忌殺之伯州黎
 奔楚經不書傳不言其義凡殺大夫未有不

書者如以不告為例他大夫書未必盡因告
 舊史備不備耳
 鄢陵之戰敘事支誕士燮佐中軍業已為將而
 戰惟恐勝是豈人情蓋因三卻將敗晉政將
 衰而附會之其實晉臣無此識量也晉侯筮
 遇復繇明言射楚王中目魏錡夢射月退入
 泥戰死皆因事附會之兩壘相拒必非甚邇
 伯州黎登巢車望晉軍何了然也臨陣矢石
 交接楚子以弓問卻至卻至免胄從容致辭

樂鉞執榼飲子重子重飲而復鼓皆夸飾之
誕說也

十七年鄭子駟侵晉不書衛為晉侵鄭則書鄭
與楚盟楚戍鄭不書晉伐鄭則書春秋不直
晉曉然豈得謂屏楚而專晉邪

齊靈公母聲孟子私慶封鮑牽言于朝公刑之
傳謂仲尼曰鮑莊子之智不如葵葵猶能衛
其足此調笑語不似聖人法言與譏陳大夫
洩冶同謬

魯聲伯夢涉洹桓水食瓊瑰盈懷此因聲伯將
死禮含用珠玉附會之又云三年不敢占占
之夕死怪誕尤甚

晉殺其大夫卻錡卻犇卻至十八年春正月晉
殺其大夫胥童傳曰民不與卻氏胥童道君
為亂故皆書殺大夫非也有如民與卻氏胥
童不道君為亂不書殺大夫將何書乎經無
此等例

十八年齊殺其大夫國佐傳曰棄命專殺以穀

叛故非也。傳意以書名為有罪之例。不知陳大夫洩冶、衛大夫孔達皆名。又何罪乎？後儒記禮遂以殺大夫為義，皆傳誤之也。
 楚子鄭伯伐宋，宋魚石復入于彭城。傳曰：凡去其國，國逆而立曰入，以惡曰復入，非也。魚石以宋臣逃楚，復入于宋，文義自爾，何必為例？公至自晉，晉侯使士匄來聘，傳曰：拜朝也。君子謂晉于是乎有禮，非也。魯君無歲不朝，晉晉不加禮，諸侯朝晉，大夫報聘，何禮之有？凡傳

之尊，晉類此。

襄公 凡五十八條

元年春，仲孫蔑會晉欒黶、宋華元、衛甯殖、曹人莒、人邾人滕、人薛人圍宋。彭城，傳曰：非宋地，追書非也。按彭城，本宋地，後併于楚，而時尚未定屬楚也。六年夏，楚子伐入之。今年春，晉遂圍之，其不當書楚甚明也。何謂追書非宋地而經寧誑語乎？或曰：春秋書邑皆不繫國，此繫宋何義也？曰：不繫國者，如盟會于某地

之類若攻圍未有不繫國者昭公二十一年
書宋華亥等自陳入于宋南里以叛南里繫
宋又何例乎

九月辛酉天王崩無傳邾子來朝傳曰禮也冬
衛侯使公孫剽來聘晉侯使荀罃來聘傳又
曰禮也皆非也夫以天王之喪諸侯不奔而
友邦私相朝聘春秋之義了然謂之禮豈不
悖哉

二年傳曰齊侯伐萊萊人賂齊寺人夙沙衛以
索牛馬皆百匹齊師乃還君子是以知齊靈
公之為靈非也夫諸侯之為靈者非一君招
權納賄者非一臣其弑君篡國皆以賂免莫
多于晉何獨于齊發此

夏五月庚寅夫人姜氏薨傳稱季文子取成公
母穆姜之櫬葬之謂之非禮且曰虧姑成婦
逆莫大焉引詩其維哲人順德之行譏之夫
魯以千乘之國豈乏一櫬用于婦未必遂虧
于姑此細事何足以定季孫之不哲何遂為

莫大之逆季孫逆與不哲不專在此

四年七月戊子夫人嬖氏薨傳稱匠用季孫所
樹槨為觀曰多行無禮必自及意謂季孫用
穆姜之觀葬齊姜人亦用其槨以葬定嬖夫
七尺之木何遽當無禮之及其論偏曲多類
此

冬公如晉傳曰聽政因請屬鄆以助魯之賦晉
許之按諸侯于晉有常貢子產壞晉館垣以
納車即貢幣之車也其賦重故魯請鄆為助

晉許之八年公復如晉聽朝聘之數是晉受
諸侯朝貢無異天子而傳以為當然可怪也
故愚謂傳本晉人作耳

是年冬十月邾人莒人伐鄆臧紇救鄆侵邾邾
人敗之于狐駘台死者多國人不備凶服至
鬻髮搯以逆喪則其敗屺已甚不書諱也傳不
及豈亦以不告邪

五年王使王叔翹戎于晉晉人執王叔使士魴
如京師言王叔貳于戎也夫天子之卿士有

天子在晉焉得遂執之此其託辭助我辱天子故不書為王諱也春秋之義忠厚如此傳不知

楚殺其大夫公子壬夫傳曰君子謂楚共王於是刑非也壬夫執政貪以蒙誅雖無盆水加劍之禮亦賢于官邪寵賂之章晉六卿貪饕不法所以亡也謂此不刑刑將安施

六年春王三月壬午杞伯姑容卒傳曰始赴以名同盟故非也初桓公十二年盟杞侯于曲

池比卒亦不名魯杞婚姻何必同盟春秋無此例前所以不名者世遠史闕也

八年正月公如晉傳曰如晉朝且聽朝聘之數夏季孫宿會晉侯鄭伯齊人宋人衛人邾人于邢丘傳曰命朝聘之數夫諸侯朝貢天子乃有常數東遷以來未聞諸侯貢周也五霸主盟未聞率諸侯貢王也此晉責諸侯朝聘於晉耳傳侈譚之不以為僭豈春秋之義歟又曰大夫不書尊晉侯也夫晉已侈矣何為

又尊之。公如晉，鄭伯會，而公不與。獨與季孫
卑君而重臣，是教季孫無君也。春秋惡晉，何
為反尊之？率諸大夫貢王，此晉責諸大夫也。
九年春，宋災，傳敘宋諸臣救災事甚詳。張閭閻
失火，何至舉國張皇？晉士弱謂宋居商丘，為
火正闕伯之墟，是多火災，悠謬之譚也。
夫人姜氏薨，傳稱姜以僑如之亂，徙東宮，筮卦
遇隨，引易曰：元體之長也，亨嘉之會也，利義
之和也，貞事之幹也。體仁足以長人，嘉會足

以合禮，利物足以和義，貞固足以幹事。此孔
子乾卦文言名理奧義，姜氏焉及此！況姜之
徙在成公十六年，孔子尚未生也。晚贊易作
文，言距姜徙時已八十餘年，姜安得此語而
先稱之？則傳之為後人作，甚明也。宋歐陽脩
顧謂文言用穆姜語，楊儀因詆元者善之長，
為害道。朱元晦謂古有是語，穆姜與孔子皆
引之，寧詘文言終不敢議傳，退孔子遷就左
丘明，千古耳食賢愚共蔽可笑也。

是年秦侵晉不書史不備也傳謂秦使士雅牽
 乞師于楚以伐晉子囊曰晉官不易方舉不
 失選六卿相讓晉不可敵事之而後可此非
 子囊之言傳譽悼公之言也是時晉楚交構
 晉招吳撓楚楚連秦脅晉吳近而詳秦遠而
 闕耳謂子囊辭秦非也

戲之盟襄公歸自晉晉悼公宴于河上問襄公
 年對曰十有二歲矣晉侯命之冠季孫請及
 兄弟之國而假備焉行及衛冠于成公廟夫

衛公魯近矣不歸醮于廟而假備鄰國傳以
 為禮非也禮諸侯未冠除喪入見天子天子
 賜冕服于太廟歸設奠服賜服于斯乎有冠
 醮無冠醴晉欲以天子自處以諸侯視魯而
 季孫為此悅晉耳何禮之有

傳稱晉悼公能息民三駕而楚不能與之爭非
 也三駕謂十年師于牛首十一年師于向其
 秋觀兵于鄭東門鄭服也晉悼公之世楚共
 王當國子囊為政晉楚爭鄭鄭以犧牲玉帛

待于二境。楚來從。晉來從。晉牛首之役。鄭方從。楚晉以諸侯救之。遇楚師。不敢戰而退。十一年六月。晉以諸侯師于向。圍鄭。七月。鄭人受盟于晉。楚子囊以秦師伐鄭。鄭使良霄石鼻。綽辭。楚楚人執之。是年九月。晉以諸侯之師至鄭。鄭又與晉盟。秦人伐晉。救鄭。敗晉于櫟。此所謂三駕也。晉未嘗勝。楚未嘗敗。而鄭往來晉楚間。如陽鳥。何謂楚不能與之爭。此與穀梁稱齊桓公兵車之會。四衣裳之會。

十一。皆諛霸之陋說也。讀者以為丘明語未

加察耳。

十年。諸侯會于相。查傳稱齊高厚相太子光不

敬。士莊子知高厚太子光皆將。不免。此為十

九年。齊殺高厚。二十五年。光遇弒。附會之也。

不敬不免。遂成通套。

宋公享晉侯。以桑林之樂。晉侯見舞師。題旌。夏懼。遂疾。卜桑林為崇。禱而愈。意謂桑林殷光王樂。宋所以事神。故為崇。悠謬甚矣。

傳。晉人滅偪陽。俘偪陽子，以歸。居其族于霍。傳謂為有禮。非也。無故滅人國，俘人君，而以居宋族為禮，是何禮歟。其為晉人文惡如此。

楚公子負鄭公孫，輒帥師伐宋。遂侵魯，還克蕭。孟獻子曰：師競已甚，鄭其有災。其執政之二三士乎。此為鄭尉止將殺子耳。子駟子國附會之。春秋師競者多矣，何獨知此有災乎。

楚使鄭人侵衛。衛孫文子卜追之，獻兆于定姜。姜曰：征者喪，雄禦寇。云有夫出征而喪其雄。姜曰：征者喪，雄禦寇。

之利。遂追之而獲鄭皇耳，亦附會之談。

冬，成鄭虎牢。傳曰：書成鄭虎牢，非鄭地。言將歸焉，非也。蓋因二年冬戚之會，書城虎牢，不繫鄭。遂謂仲尼不以虎牢與鄭，謂虎牢為華夷之防也。夫堂宇之間，以限華夷，謬矣。況天王既予鄭仲尼焉，得奪之，且何待仲尼後歸之。也不書鄭，則為奪書鄭，則為將歸。世儒以為天子之事云爾，而其誣仲尼亦已甚矣。蓋晉悼之季，中原擾攘，諸侯無歲不役。詩云：匪兕

匪虎率彼曠野書戍傷之也奈何更侈譚之
 十二年冬公如晉傳曰朝且拜士魴之辱禮也
 非也魯以諸侯朝于諸侯晉以大夫報諸侯
 之朝而又往拜其辱此足恭何可為禮
 十三年春公至自晉傳以孟獻子書勞于廟為
 禮非也襄公十一年魯從晉會諸侯于蕭魚
 鄭服于晉與魯何預十二年夏晉士魴來聘
 秋公如晉報之碌碌奔走為人役耳無勞可
 書仲尼豈以是為禮

夏取郟詩傳曰書取言易也用大師曰滅弗地
 曰入非也狄人入衛衛遂以遷則地亦入也
 凡傳之例皆無端強作
 傳稱晉侯蒐于綿上士句辭中軍帥讓于荀偃
 六卿皆讓晉國之民是以大和諸侯遂睦皆
 非也夫晉六卿之不相能久矣明年伐秦卿
 帥不睦諸侯不整為遷延之役以至欒鍼死
 敵欒黶逐士鞅自是以後諸卿日侈遂底于
 亡而曰晉國以平數世賴之非妄語邪

冬城防。傳曰：書時，非也。防，臧孫氏之私邑。大夫城私邑，書以譏之。非為時也。時則不書。

楚子囊請歸鄭良霄。曰：使歸而怨其君，以疾其大夫，而相牽引，不猶愈乎？此為三十年。鄭人殺良霄，附會之。

十八年，晉荀偃將伐齊。夢與晉厲公訟，不勝。厲公以戈擊偃，偃首墜地。偃奉以走，問于梗楊之巫。巫夢亦然。偃果死于伐齊之役。此甚怪誕，不經，非不語之教。

楚公子午帥師伐鄭。傳稱晉師曠云：不害吾驟歌北風，又歌南風。南風不競，多死聲。楚必無功。此術士風占之譚。

十九年，傳稱晉伐齊之師還，荀偃疽發于首，目出口，噤以其未卒事于齊也。欒盈撫尸誓之，乃瞑。受含，此為是年晉欲再伐齊，附會之。豈弑君之賊而急公事若此歟？

衛石買卒，其子石惡不哀。孔成子曰：是蹙其木，必不有其宗。此為二十八年石惡出奔，附會。

之。

二十年衛甯殖將死悔屬其子喜納獻公賊臣逐君焉知悔悔而求復則公孫剽在位六年矣又納衎將何以處剽是明教其子弑君也何悔之有。

二十一年晉會諸侯于商任傳稱齊衛二君不敬叔向知皆不免此因二十五年齊弑光二十六年衛弑剽附會之。

二十四年王城大水齊人城郊是時齊方背晉。

按傳文只云大水而不

云王城

欲市德于周春秋以為齊事耳故不書傳不及。

二十六年公會晉人鄭良霄宋人曹人于澶淵傳曰趙武不書尊公非也是役也晉人疆衛田以與孫林父書皆惡之不名史闕也且書入何必盡大夫苟大夫也君前臣名不名尊。

衛獻公如晉晉人執而囚之齊侯鄭伯為之請不釋衛侯納其女于平公乃釋之皆不書春。

春秋左傳卷之二十一
秋于諸侯貪淫敗禮除弑逆會盟征伐外不
毛舉寬仁博大之至也傳不達

鄭簡公與齊景公同如晉為衛獻公請既而得
釋鄭伯歸復使子西入晉謝傳稱其善事大
國夫以晉侯之貪淫而鄭為足恭何善之與
有

二十七年晉楚諸大夫會于宋為弭兵也楚令
尹子木欲衷甲赴會伯州犁不可子木曰苟
得志焉用信伯州犁知子木不及三年必死

此為明年子木卒附會之

秋七月辛巳豹及諸侯之大夫盟于宋傳謂季
孫以君命命豹曰魯視邾滕豹盟視宋衛不
書族以違命故非也豹不族諸大夫亦不名
皆蒙前會于宋之文耳事同人同故省如豹
以違命諸大夫何以乎是盟也楚人先歃傳
謂書先晉晉有信亦非也晉長于諸侯舊矣
禮不以新間舊終春秋未嘗以楚先齊晉非
獨此耳

按謂上
或勝字

二十七年。鄭伯享趙孟于垂隴。子展伯有等七人從。趙孟使各賦詩。觀志立談之頃。決七子先後存亡。何響應也。伯有從君。樂賓而歌。君無良其喪心乎。此謂居下流而衆惡歸焉者也。與二十九年季札觀魯樂皆非實錄。二十八年魯梓慎以歲星過次。淫于子。知宋鄭。飢鄭禘竈以歲星過次。占周楚君亡。為是年八月旱大雩。明年天王崩。楚子昭卒。附會之。蔡侯朝晉歸。過鄭。鄭伯享之不敬。子產知蔡侯。

不免曰。淫而不父。恆有子禍。此因二十九年蔡世子弒君。附會之子產焉。知其將淫。子婦也。宋之盟。晉楚之屬。諸侯交相見也。是年宋公陳侯鄭伯許男皆如楚。不書。然則朝楚與朝晉等耳。皆不足書也。春秋未嘗以朝楚為事。夷狄可知矣。如以中國事夷狄。雖外諸侯未有。不書者。傳不達也。非也。王。二十九年。鄭伯使游吉聘楚。及漢。楚辭鄭伯親往。游吉謂楚子貪昧。逞願將死。夫春秋諸侯誰非貪昧。

者此因楚子將卒而附會之。十有二月甲寅天王崩傳曰癸巳天王崩未來赴亦未書禮也非也靈王崩後二十有二日聞赴始書經据史耳天子喪不赴不書于禮何居經存其誤以直不恪也不書葬見魯之不會也傳不達。公如楚傳稱公過鄭鄭良霄迎勞公不敬穆伯知良霄必有大咎此為三十年鄭殺良霄附會之。



二十九年春王正月公在楚傳曰釋不朝正于廟非也每歲首公在不書朝正公不在何必釋不朝昭十六年正月公在晉亦不書知此非為不朝正也為楚止公送葬強公禘書以甚楚耳。城杞之役齊高止宋華定與晉荀盈相見司馬侯相禮知二子不免為是年秋高止出奔燕昭公二十年華定出奔楚附會之。吳季札聘魯知叔孫穆子不得其死因叔孫有

豎牛之禍先附會之誦詩觀樂而知德之隆
晉國之興亡如燭照果爾札賢于仲尼遠矣
仲尼學琴師襄在齊聞韶須以時月而札立
譚懸解豈有神慧邪札聘在襄公二十九年
孔子哀公十一年自衛反魯正樂然後雅頌
得所札先五十九年觀樂雅頌次第一昭
合其為後人附會甚明也世以傳出丘明蔽
而不察耳

三十年五月宋災傳云或叫于宋大廟曰謔謔

出出烏鳴于亳社如曰謔謔甲午宋遂災委
巷之譚也

鄭良霄出奔許自許入于鄭鄭人殺良霄傳云
不稱大夫言自外非也非大夫則已苟大夫
也豈以外人削之蓋上書鄭良霄出奔後入
下不得更加大夫尋常文義以鑿失之

冬諸侯大夫會于澶淵宋災故傳謂魯叔孫豹
在會不書以賑宋諱非也伯姬魯女魯自賑
之七月叔弓已先如宋澶淵之會實不與也

三十一。年。叔孫豹自晉歸。告孝伯曰。趙孟語偷。將死。又以孝伯語益偷。知孝伯亦將死。為是。秋。孝伯卒。明年。趙孟卒。附會之。夏。六月。辛巳。公薨于楚宮。傳謂公自楚歸。作楚宮。穆叔謂公欲楚矣。必死是宮。六月。果薨。皆附會之說。言自公非也。此大夫之公。冬。十月。滕成公來會。葬。傳謂滕成公情而多涕。子服惠伯料其將死。為後三年。書滕子卒。附會之。

鄭子皮使印段如楚。告適晉。欲朝晉而畏楚。稟命耳。傳以為禮。何之有。

莒人弒其君密州。傳謂密州已立其世子展。與廢之。展與因國人弒父。書莒人。言罪在密州。非也。子弒父。猶云罪在父。豈春秋之義。

昭公 凡五十五條

元年。諸侯之大。夫會于虢。趙孟過。雒。王使劉定勞之。指洛水。嘆禹功。以獎趙孟。趙孟曰。吾儕偷食。朝不謀夕。劉子歸。語王曰。趙孟不復。

年矣。是年冬，趙孟卒。夫朝不謀夕，人之恆言。何遂當歿此附會之尤誕者。

秋，莒展與出奔吳。傳謂展與奪羣公子之秩。羣公子逐之，立其弟去疾。君子謂莒展之不立，以棄人非也。弑父之子，雖不奪人之秩，得長世乎？傳言偏蔽類此。

鄭子產將放游楚于吳，問于游吉。對曰：周公殺管叔而蔡蔡叔，夫豈不愛王室故也？按周公遭兄弟之謗，避位居東。二年成王殺管叔，公

實不預。詩書俱在，可考也。而其誣起于古書。蔡仲之命書有古文，亦猶傳之有左也。傳又取徵焉，是以誣徵誣耳。

二年韓起聘于魯，觀書于太史氏。見易象與春秋。曰：周禮盡在魯，吾乃今知周公之德與周之所以王。夫易象作自周公是也。春秋是時猶魯史耳。孟子云：魯之春秋，晉之乘，楚之檮杌，一也。何國無史？春秋能重魯乎？不經聖裁，周公其衰矣。何德之知此？後人因孔子推重

春秋甚明也

二年鄭游吉如晉送平公妾少姜葬晉張趯與言晉如火中將退矣齊晏平仲與叔向言陳氏將有齊叔向亦數晉公室將卑夫與外臣言而揚國惡非禮也三子必不然傳欲附會先見適以彰其薄耳

四年秋楚子帥諸侯之師伐吳執齊慶封殺之傳稱慶封辱楚子蓋緣飾之辭其實殺慶封亦一義舉也經以討賊及之傳不達

十二月乙卯叔孫豹卒傳謂叔孫豹死于家臣豎牛之手與庚宗婦人遇而夢天歷己號牛其事甚怪又稱穆子初生父莊叔筮遇明夷之謙卜人楚丘預知有豎牛皆悠謬之譚也楚子求婚于晉晉使韓起叔向送女于楚楚子謀則韓起宮叔向欲以辱晉遠啓疆止之夫晉女于楚使一卿送之其事楚備矣新婚而辱人使何為此惡楚虔橫而甚之事未必有六年鄭子產鑄刑書晉士文伯曰鄭其火乎火

未出而作火以鑄刑器不火何為是年六月
 鄭遂火亦附會之譚
 七年春王正月暨齊平傳謂燕與齊平非也誤
 蒙前齊侯伐北燕為一事遂云燕人歸燕姬
 賂以瑤瓊玉罕本他事牽入誤也春秋惟魯
 省國書及定公十年春王三月及齊平十一
 年冬及鄭平叔還如鄭泣盟皆魯及也正月
 暨齊平三月叔孫婁如齊泣盟與十一年書
 法正同若齊伐燕與之平當云暨燕平何為

反主燕而暨齊平是時昭公善楚娶于吳齊
 畏魯求平魯暨之平耳時公將如楚故使叔
 孫往盟傳之無替妄說如此
 夏四月甲辰朔日食晉侯問士句誰當之對曰
 衛君魯上卿為是年八月衛侯卒十一月季
 孫宿卒附會之
 晉人來治杞田季孫遂以成邑與之失地不書
 此正所謂非公命者也傳反不及
 鄭子產聘于晉晉平公有疾夢黃熊入寢子產

曰。繇也。此術士厭魅之譚。子產既知人道。適
 豈作此解。又鄭伯有死。見夢曰。壬子將殺駟。
 帶壬寅殺公孫段。如期死。子產云。伯有生而
 取精多用。物弘族大。而憑厚強。死為厲。夫春
 秋大族強。死者多矣。而皆為厲。則厲鬼塞人
 間矣。豈聖人義之教○トシヤ

八月戊辰。衛侯惡卒。傳謂衛襄公長子孟絜足
 不良。次子元立。是為靈公。靈公未生。孔圉之
 祖孔成子與史苟之父史朝。兩人同夕夢康

叔命立元。使圉與苟相之。至是孔成子果立。
 靈公。此類即實有之。于經何補。而專喜談。況
 未必有也。

八年春。晉有石言于魏榆。平公問師曠。對曰。作
 事不時。怨讟動于民。則有非言之物而言。此
 因平公築虎祈宮成。薨附會之。

冬十月。楚師滅陳。晉史趙曰。陳顓頊之族。歲遇
 鶉火。而滅。遇析木。而復。又明年四月。陳地災。
 鄭裨竈以水火之數推之。知五年。陳將復。五

十二年而亡。此星，士緯度之言。果爾，君之存亡國之興廢，惟星惟度，而人道無權矣。豈春秋之義。

楚殺陳孔奐，無傳，不詳其故。九年，晉與周人爭閭田，晉率陸渾之戎伐周，不書，傳不言其故。

冬，築郎囿，傳曰：書時非也。魯之不競甚矣。猶作無益，故書。

十年正月，有星出于婺鄭，裨竈言于子產，曰：七年

月戊子，晉君將死，此為晉平公將卒附會之

十一年五月甲申，夫人歸氏薨，大蒐于比蒲，傳

曰：非禮也。及仲孫，獲會邾子盟于祲，祥傳又

曰：禮也。夫國有大喪而講武，預會盟皆非禮

也。豈蒐獵非而會盟是乎。

秋，諸侯大夫會于厥憇，傳稱周單子視下而言

徐晉叔向知其將死，此為十二月單子卒附

會之。

魯昭公送母葬，不感。晉史趙聞之，知昭公不歸。

此以昭公客死附會之逢人知死何料死者之多也

十二年楚靈王伐隨次乾干谿與右尹子革言甚侈子革歌祈招之詩諷之王至饋不食寢不寐者數日楚虔剛愎何感悟神速乃爾脩飾之辭

十四年春意如至自晉傳以不書族為尊晉罪己為有禮非也不書族蒙前執季孫意如之文而省耳春秋未嘗尊晉意如未嘗罪己何

禮之有

晉叔向弟叔魚攝理納雍子之女而蔽罪邢侯邢侯殺雍子于朝韓宣子問于叔向對曰三人同罪晉遂殺叔魚傳曰叔向古之遺直也三數叔魚之惡不為末減平丘之會數其賄歸魯季孫稱其詐邢侯之獄言其貪殺親益榮義也嗟乎仁人之于弟也殺之而為榮乎何義之有

十五年十二月晉荀躒籍談如周會王后太子

十之葬。王宴之。而索晉彝器。二子歸以告叔向。
 叔向曰。王樂憂其不終乎。夫索器何以知其
 不終。此因二十二年王室亂附會之。
 傳稱十六年春王正月公在晉。不書晉人止公。
 諱非也。去年冬書公如晉。今年夏書公至自
 晉。留晉者半年不言止而止可知也。如謂諱
 之。襄公二十九年楚止公送葬亦踰年至正
 月。書公在楚。何以不諱。不諱甚晉也。凡如晉
 至自晉必書。

齊景公伐徐。徐人行成。郊人莒人皆受盟于齊。
 魯叔孫昭曰。諸侯之無伯害哉。是時晉衰齊
 稍振。魯人忌之。云爾。即晉霸而魯未嘗息肩
 也。詩云。四國有王。邠伯勞之。世無明王焉。得
 有賢伯。春秋所以惡霸也。傳不達。
 十七年冬有星孛于大辰。魯梓慎占知宋衛陳
 鄭災。為明年四國災附會之。
 十八年春王三月。曹伯須卒。按傳同盟例書名。
 曹平公與魯昭公未嘗同盟亦名。然則傳例

非也。

夏五月壬午。宋衛陳鄭災。傳稱子產救火。與襄公九年。宋災。哀公三年。魯災。語雷同。拯焚可也。舉國張皇。無謂也。告於諸侯。可也。陳不救火。許不來弔。二國先亡。無謂也。

十九年。夏五月戊辰。許世子止殺其君。買傳曰。悼公癯。飲太子止之藥。卒。太子奔晉。書曰。弑其君。君子曰。盡心力以事君。舍藥物可也。公穀因之。遂謂許止孝子。與稱趙盾良大夫。並

反覆講張枉經義之實。違聖人之情。皆諸傳之罪也。豈許止不弑父。趙盾不弑君。而春秋枉之乎。萬無是矣。

二十年。夏。曹公孫會自鄆出奔宋。無傳。凡書出奔。必有事。昭公世近。而傳不知。豈丘明之作歟。十有一月辛卯。蔡侯廬卒。蔡平公未同盟。亦書名。傳例非也。

二十一年。周景王將鑄大鐘。泠州鳩謂鐘大則

檮化檮則不容其生心疾死此為明年景王崩附會之

七月壬午朔日食傳謂叔輒哭日昭子知其將死八月卒夫日食何哭哭日何預死誕也

宋華亥向寧華定自陳入于宋南里以叛傳謂居新里而助公者既戰脫甲于公乃歸居于

公里助華者亦脫甲于華氏歸言無私爭也豈其然乎

二十四年媯至自晉傳以不稱族為尊晉非也

蒙前晉人執我行人叔孫媯省文耳晉倚強

辱諸侯使臣何用尊為

夏五月乙未朔日有食之梓慎曰將水昭子曰

旱也日過分而陽猶不克克必甚能無旱乎

因是年秋大雩附會之

秋八月丁酉杞伯郁釐卒杞平公亦未同盟例

又非也

王子朝用成周之審珪于河津人得諸河上將賣之珪變為石周大夫陰不佞取之玉也以

春和羽左 卷下
獻于王得邑夫玉焉能變如市井貨郎作賺
眼法虹小子可以輔經乎後世史書好誕不
根左作俑也

二十五年春叔孫婁如宋宋樂大心與語自卑
其大夫而賤其宗此主人對客常語婁謂無
禮必亡為定公十年大心出奔附會之又宋
公與婁飲酒語泣樂祁謂君與叔孫皆將死
為是年冬宋公叔孫俱卒附會之

有鸛鶴來巢傳曰書所無非也世謂鸛鶴不踰
濟濟水在魯鸛鶴非絕無一名鴝鳩不能巢
孚子空穴中故鳥官以名司空常寄居鸛巢
詩云維鵲有巢維鳩居之比國君夫人無成
有終妻道也臣道也來巢是無成知始臣擅
君之兆非為書所無也傳謂文成時有童謠
竝昭公出奔死乾侯定公繼立皆詳之按文
成太昭百有餘年矣豈童謠先若此其明告
邪此附會之辭後世史多效之

冬十月戊辰叔孫婁卒據傳之例大夫卒公與

小斂則書日。是時昭公在外亦日傳例又非也。

二十六年九月庚申楚子居卒楚平王未與魯同盟亦書名傳例又非也。

二十六年傳稱齊有彗星景公使禳之晏子止之齊魯相近豈齊見而魯不見不書何也杜預謂在齊分野然則凡書星變者盡在魯分野乎蓋舊史闕耳傳不及豈亦以不告為例邪。

二十七年冬十月曹伯千卒按曹未同盟亦書名傳例又非也。

二十八年夏四月丙戌鄭伯寧卒秋七月癸巳滕子寧卒二君未同盟皆書名昭公世近史詳耳非例也。

二十九年夏四月庚子叔詣卒是時公在外不與小斂亦書日傳例又非也。

有龍見于晉郊魏獻子問古秦龍氏于蔡墨舜世有董父能畜龍夏后氏有劉累能擾龍官

宿其業。其物乃至。夫龍神物焉。可畜。謂古可畜。今不可畜。辭窮矣。引五行之官為証。夫五行陰陽之氣。非官所得司也。少皞之四叔。顓頊共工烈山之三子。人邪鬼邪。鬼則何以事人。人則不能司神。悠渺之譚。非民義之教。傳稱晉賦鐵鑄鼎。以著范宣子所為刑書。仲尼曰。晉其亡乎。失其度矣。貴賤不愆。所謂度也。文公作執秩之官。為被廬之法。以為盟主。今棄是度。而為刑鼎。民在鼎矣。何以尊賢。按此

非仲尼之言也。晉文公執秩。被廬之法。與范宣子刑書不可考。要皆衰世苟且之令。非先王之典。刑也。仲尼奚貴焉。晉亂政多矣。其亡也。豈在刑鼎。

三十一年夏四月丁巳。薛伯穀卒。傳曰。同盟故。書非也。前此不同盟。書者屢矣。赴則書。不赴則不書。冬。黑肱以濫來奔。黑肱。邾大夫。不書。邾以下。子七年。邾快來奔。魯人納之。今年又納黑肱。蒙

前事再甚魯也。傳曰：以地叛，雖賤書名，謂之欲蓋名章，非也。叛臣亡子，人共知共惡，名何足懲？不名何足誌？春秋微婉之義，不在此。趙簡子夢童子羸而歌，明日遂日食。史墨以為後六年吳入郢之兆，必以庚辰附會，迂誕之甚。

定公

凡九條

元年諸侯大夫會城，成周。齊高張後至，晉女叔寬曰：周萇、弘、齊、高、張皆不免，萇、弘違天，高于

違人意，謂天厭周，而萇、弘欲遷都，存周是謂違天。高、張後至，是謂違人。以此料二子皆死。因哀公三年周殺萇、弘，六年高、萇來奔，附會之，迂誕甚矣。又公遷于陶，公之遷也，亦書傳例，非也。

四年春王正月癸巳，陳侯、吳卒。按陳魯未同盟，亦書傳例，非也。衛靈公將為昭陵之會，何預知與蔡爭長？強使祝佗從，因子云：祝佗之佞附會之。五年春王人殺子朝于楚，世儒以楚納子朝為

正大惡然經不書殺是未嘗以亂賊律子朝也
景王太子早死子朝為長庶王猛敬王皆其
弟也敬王在位久為天下共主故尊之非以
子朝為必可殺也傳不達

十年夏公會齊侯于夾谷傳稱孔丘相齊以萊
兵劫公孔子以公退辭却之此欲譽孔子不
知其謬也夫魯既與齊平矣何為又劫之兵
既集孔子以公退退將焉往齊人謀之積日
以口舌解之臨事未可幾也又謂齊將詐享

公孔子言于梁丘據免夫齊不劫公則已劫
公而失之于萊兵又謀于飲酒不已拙乎見
幾不早先事不備以至狼狽虎口然後因細
人求免智者不為況聖人乎凡傳之無識類
此

十二年叔孫州仇帥師墮郈季孫斯帥師墮費
傳云仲由為季氏宰將墮三都於是仲孫墮
郈季孫墮費不詳其始末未知當時子路勸
二子使之墮邪抑威之使不敢不墮邪又謂

孟氏宰公斂處父不肯隨成然則子路之力能伸于仲孫季孫何獨詘于孟孫也其後成不隨不知既隨之邱費作何狀傳皆不詳論語公伯寮愬子路于季孫季孫惑志于公伯寮孔子謂道之將行將廢有命疑即此事也若使左丘明作傳當時目擊豈茫昧若此乎十三年薛弒其君比無傳此大事烏可無傳也大抵傳于凡小國之事皆略不載非春秋本義

十五年九月丁巳葬我君定公雨不克葬戊午日下是乃克葬傳以雨不克襄事為禮非也大事不戒作且輟其慢已甚焉得為禮詳宣公八年

冬城漆傳曰書不時告非也漆邾庶其之叛土也魯人納之遂城之為盜主藏書設也哀公 凡十三條

元年吳王夫差敗越于夫椒報檇李也經不書傳謂吳不告敗非也當是時吳求霸甚亟敗

越未有不告者夫差彊梁自用殺謀臣信奸
示邪覆秦伯之宗皆驕于夫椒之一勝耳昔者
齊魯之霸也一戰而強吳之霸也一勝而滅
故夫椒之捷不與名陵城濮同書齊魯遞哀
而吳先亡五霸之業足以觀矣傳不達

三年五月辛卯桓宮僖宮災傳敘諸臣救火事
與昭公九年鄭災襄公九年宋災皆脩飾之
辭又謂孔子在陳聞火曰其桓僖乎此因桓
僖二廟宜毀不毀附會之

八年十二月癸亥杞伯過卒按杞伯未同盟亦
書名傳例非也

十年夏薛伯夷卒未同盟亦書名非夷狄亦不
月傳例非也

十一年秋七月辛酉滕子虞母卒未同盟亦名
時事詳耳傳不達

吳子夫差不用伍員計舍越伐齊員知吳將亡
屬其子于齊鮑氏吳子賜員劍自殺經不書
殺大夫何也蓋伍員叛宗國辱故主弑王僚

殘險輔桀而欲保其身難矣當時奇其蹟後世惜其死春秋不錄吁所以為春秋也傳不達

十二年夏五月甲辰孟子卒傳曰昭公娶于吳故不書姓死不赴故不稱夫人不反哭故不言葬小君非也蓋季氏不以昭公為君生不歸國葬不附祖廢其二子何有于其妻仲尼弔季氏不統不經是不以為君夫人也不以人為君夫人而書君夫人則孟子蒙虛名而季

氏揜無君之惡春秋無毀譽傳信而已不稱夫人不言葬小君直也

衛侯會吳子于鄭吳人止衛侯魯使子貢往說曰衛君來之緩也其臣之黨吳者欲之讐吳者不欲也今執之是墮黨而崇讐也與宣公十三年夏許男成卒不同盟亦書名非夷狄亦不月傳例皆非也

於越入吳按吳與越猶唯與阿也吳敗越不書

越入吳書何也春秋卑五霸二百四十年之間五國成敗立觀矣而吳最先亡詩云雨雪浮浮見晁日流如蠻如髦我是用憂霸者之事歟仲尼之徒所以羞稱也傳不達

十四年春西狩獲麟公穀謂春秋終獲麟是矣今傳終哀公二十七年經終哀公十六年夏四月己丑孔丘卒豈卒之日始絕筆乎則信終于獲麟矣終于獲麟不宜獲麟後復有經說者謂爲舊史然何其簡約肖經之甚也經

文簡恃舊史詳經必不準舊史也今謂獲麟後三年所書卽舊史則獲麟前十二公之文皆舊史矣焉用仲尼筆削爲也正月書王此新義也獲麟後亦正月書王其非舊史甚明蓋傳以孔子本獲麟作經欲引經終孔子故續經至哀公十六年孔子卒而傳直至哀公二十七年將自成一家之書原非專爲輔經而作若使丘明輔經作傳經終則傳止何爲汎濫于獲麟之後乎左丘明姓名見論語子

云左丘明恥之丘亦恥之殆夫子先輩而嚴
 事之故自名以附之猶言竊比我老彭云爾
 假使年相若夫子卒于哀公十六年七十有
 三春秋絕筆于先二年傳絕筆于哀公二十
 七年後孔子卒又十二年則是八十有五歲
 矣八十五尚作傳當以何年卒是必年少于
 孔子與游夏齒乃可既與游夏齒當在弟子
 列而七十子中無左丘明則是孔子先輩不
 為孔子作傳又甚明也司馬遷謬信之杜預

因之後世遂謂左丘明親見夫子其言必可
 信至于牽強附合以求通其說而其誣春秋
 誤後學多矣不得不辨

左丘明姓名見論語論語為聖人傳神之筆也
 其曰子不語怪力亂神此孔氏之家法六經
 之典刑春秋之繩尺也今據傳皆犯此四者
 如蛇鬪石語人死六日復生玉變為石極作
 牛聲之類是語怪也如魯秦董父狄虎彌齊
 殖綽郭最晉州綽邢蒯輩麤悍武夫傳皆枚

舉其人。是語力也。春秋雖為亂臣賊子作其
于弑君賊父之事。皆詳審精確。必不得已而
後書。如有疑。寧闕。寧從。輕如鄭子駟。楚子圍
弑君之類。皆書君卒。而傳皆執信不疑。其他
貪淫黷亂。諸委瑣事。經不及。而傳津津喜譚
之。是好語亂也。至于神降鬼厲。卜筮童謠。夢
兆種種。杜撰不一而足。是好語神也。後世讖
緯方術。作俑于此。使凶邪讒諂之徒。託占象
以誤忠良。造符命以助亂賊。皆以左為嚆矢。

經術不明。流毒罔極。聖人之慮。豈不遠哉。故
夫編年指事。其功不可泯。而粉飾誇誕。過情
瑕疵甚多。學者微其事。勿溺其辭。超然遠覽。
始可與言春秋矣。

或問曰。左則非矣。春秋何為而作也。曰。為紕五
霸作也。天下無天子。五霸假方伯。擅征伐。挾
輔王室。以令諸侯。其名正而事假。其實爭利。
自為強大耳。謀王室少。而自謀多。安天下少。
而亂天下多。如晉朝同列。受貢幣無異天子。

所以改正朔稱王號耳天下見吳楚稱王以
 為僭見齊晉不稱王以為義見其東征西伐
 以為方伯為霸主謂王降而霸猶之帝降而
 王也無王不可無霸雖號為仲尼之徒者亦
 以為當然不知天下有天子而後有方伯詩
 曰四國有王郇伯勞之無天子方伯安所稟
 承而自逞胸臆會盟征伐是大亂之道也故
 孔子曰天下有道則禮樂征伐自天子出天
 下無道則禮樂征伐自諸侯出自諸侯出十

世希不失矣自大夫出五世希不失矣天下
 有道則庶人不議春秋者庶人議之者也故
 曰罪我其惟春秋自孔子沒而大義隱諸說
 紛紛穿鑿經義愈晦惟孟子為能知春秋其
 言曰春秋天子之事也世衰道微臣弑其君
 子弑其父孔子懼作春秋春秋無義戰五霸
 者三王之罪人天子討而不伐諸侯伐而不
 討五霸摟諸侯以伐諸侯仲尼之徒無道桓
 文之事者此春秋明鏡指掌而諸傳反謂春

秋尊五霸，獎齊晉，首尾衡決，蒼素倒置，學者能辨乎此，則十二公之文義可迎刃解耳。今不信孔孟而信諸傳，不由坦然明白正大之路，而紆曲穿鑿，謂春秋有隱嗟，夫世儒自隱耳。仲尼無隱乎爾，曰：請問無隱，曰：可。故舉也。最大者弑君父，其次叛亡，其次僭竊，其次滅人國，其次擅侵伐，其次會盟，其次私朝聘，其次專殺大臣，其次妄興作，其次昏喪，其次蓄異如此而已矣。雖其旨涵蓄不盡，而其是非

了然在人心目，故曰：直道而行，無所毀譽。其他非理委瑣之事，一切不書，故春秋包菜如天地，含容如滄海，寬仁博大之至也。或云：刑書褒貶命討，此後儒之俯張春秋無是也。余嘗讀西漢書，劉歆在哀帝朝，欲為左氏春秋，古文尚書立學官，大臣龔勝師丹謂尚書二十八篇本不缺，左氏本不傳春秋，此議先得我心。後漢儒林傳李育謂春秋左氏不得聖人深義，作難左氏四十一事，晉王接謂左氏

自一家之書。不主為經發。則左之不足信。昔人往往以為然。非獨余耳。唐韓退之。贈盧仝詩云。春秋三傳束高閣。獨抱遺經究終始。此數公皆有識人。但不知當世何以說春秋。恐余亦只是疑之而已。春秋不明。非一朝一夕矣。杜元凱之好左也。貴其藻麗也。左敘事浮華。杜云。先經始事。後經終義。依經辨理。錯經合異。此曲為周旋云爾。其實左傳何曾輔經。又云。微而顯志。而晦婉。而章盡。而污惡。惡而勸善。

此但可以論經。不可以論傳。其論經云。言高旨遠。辭約義微。此理之常。非故隱之。又云。子路使門人為臣。孔子以為欺天。而曰。素王素臣。非通論也。獨此數語為有識。後之言春秋不逮也。

春秋非左卷下 終

香林非古卷下
 不盡也
 海味
 後世門人
 自盛
 以出

皇都書肆 英華堂藏書品目

掘川通佛光寺下町

河南四郎右衛門

四書集注	道春點 新刻改正	十冊	楚辭全集	屈原文 朱子注	十冊	滄溟尺牘解	篠三弥	一冊
同 傍注		十冊	箋注	王逸注	八冊	同 國字解	馬玄藏	三冊
同 白文	大字點附 新刻改正	五冊	蒙求音注		三冊	曆代要覽		二冊
同 新增大全	熊谷了菴 改正	三冊	同 音釋		三冊	同 參考	毛利貞齋	五冊
學庸祕解	重山了芥	二冊	同 詳說	宇都宮由的	七冊	艸書淵海		五冊
同 解	伊藤長胤	一冊	俚諺鈔	毛利虛白	七冊	訂正三重韻	唐音附	一冊
四書故事	澹明魏時應	五冊	同 箋注	岡白駒	三冊	伊呂波韻頭書		一冊
四書字引	新刻改正	一冊	同 標題	片假名附	一冊	友韻楚		一冊
通鑑綱目	朱文公作 道乙點	五冊	新語園	了意	十冊	詩楚仄韻		一冊
後漢書	范曄	五冊	古文前集	改正大字 新刻	一冊	史記助字法		二冊
大廣益會玉篇		九冊	同 後集	改正大字 新刻	二冊	孝經		一冊

江吏部集	二冊	唐詩事類選	一冊	三體詩解	三冊
唐詩履 <small>同</small>	一冊	詩學折臂 <small>岡鳳鳴</small>	一冊	明詩大觀	五冊
唐詩紳 <small>同</small>	一冊	春秋非左 <small>郝敬山</small>	二冊	集義外書 <small>熊沢了芥</small>	十冊
唐詩冕 <small>資衡</small>	一冊	唐詩連錦	一冊	大蘭亭記 <small>義之石刻</small>	一帖
唐本類書考	三冊	玄抄類摘 <small>澤井史頭校</small>	五冊	曹娥碑 <small>烏石楷書</small>	一冊
詩語粹錦	二冊	純粹抄	七冊	樂志論 <small>烏石楷書</small>	一冊
唐詩金粉	五冊	同 諺解	一冊	醉翁亭記 <small>烏石行書</small>	一冊
匡謬正俗 <small>顏師古</small>	二冊	內閣字府	一冊	午門朝見帖 <small>徵明行書</small>	一冊
尚書大傳 <small>鄭之</small>	二冊	大唐年代記 <small>三毫帶刀</small>	十冊	南谷千字文	五冊
唐明詩格	一冊	本朝篇年小史 <small>鶴飼石齋</small>	七冊	弁州尺牘紀要	一冊
盛唐詩格	一冊	韻鏡袖中抄 <small>毛利虛白新板</small>	十冊	同五七言絕句詩集	一冊
聯珠詩格 <small>小本</small>	二冊	同 後集無點	二冊	王道昆尺牘	二冊

明和三年丙戌夏五月良辰

東都書林

須原屋茂兵衛

林 伊兵衛

皇都書林

河南四郎右衛門

二條通東洞院東二入町

日本橋南壹丁目

堀川通高辻上二町

